

Saturday, August 23, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

PM EKTA MALL

Chief Minister Pu Lalduhoma'n PM Ekta Mall sawrkarin a din tur chuan thalai mi 220 vel tan hna thar a siam dawn a ti.

Vawiina Aizawl Chawnpui veng a PM Ekta Mall sak tur lungphum a phumnaah he thu hi sawiin Chief Minister chuan PM Ekta Mall chu kum 2023-24 SASCI part 6 hmanga sawrkar laipuiin a ruahman thu a sawi a. Ram chhunga thilsiam chhuah pho chhuahna hmunpui, International Market thleng phaka tualchhung kutchhuakte zawrhna tur a nih thu sawiin Mizoram Ekta Mall-ah state hrang hrangin stall an nei ang a, Mizoram pawhin state hrang hrangte Ekta Mall-ah Stall a nei ve bawk dawn tih a sawi a ni.

Chief Minister chuan One District One Products, Geographical Indication Product leh kut themthiamte kutchhuak thehlarna leh zawrh chhuahna hmunpui a nih dawn avangin Mizoram chhunga district tinin PM Ekta Mall-ah hian stall an nei dawn tih a sawi a. State leh UT te dawr tur 36 leh Mizoram district tinte stall tur 11, a vaiin stall 47 tal a awm dawn thu a sawi a. PM Ekta Mall sa tur hian Ministry of Health & Family Welfare hnuiaia Public Sector Undertaking lar tak, HLL Infra Tech Services hman an nih dawn thu leh a enfiah hna IIFCL in Project Management Unit- a tangin an thawh dawn thu a sawi a. A sak hna thawktute chu hun bi tiam chhunga sa zo tura fuihin sa zo satliah lo a, tha tak leh quality sang taka sa zo turin a hrilh bawk a ni.

Byte of Chief Minister

Tourism Minister Pu Lalnghinglova Hmar pawhin thu sawiin PM Ekta Mall tih awmzia chu inpumkhatna bazarpui tihna a nih thu a sawi a. Sumdawnna hmunpui tur, a awmna veng mai bakah Mizoram tana hmun tangkai tak tur a nih thu a sawi a. Bul lo tantu Tourism Minister hlui Pi Lalrinpuii chung a lawm thu a sawi bawk a ni.



SAFEGUARDING THE GIRL CHILD

Social Welfare Minister Pi Lalrinpuii'n hmeichhe naupang chu an inchungkhur mai bakah sikulah leh khawtlangah thlamuang taka an awm theih nan venpui reng a tul thu a sawi.

Vawiina hmeichhe naupang te venhimna tur inrawnkhawmna State Level Multi-Stakeholders Consultation on Safeguarding The Girl Child : Towards a Safer and Enabling Environment for Her in India hun a hmanpuinaah he thu hi Pi Lalrinpuii chuan a sawi a. Minister chuan Mizoram chu ziaak leh chhiar thiam tamna lamah India ramah a sang a, mipuite an vengva bawk tih sawiin hmeichhe naupangte

humhim kawngah India ram hmun dang aiin Mizoramin a titha niin a hriat tih a sawi a. Mizo khawtlangah hmeichhiate an zalenin an vannei hle tih sawiin hetihruah hian hmasawn zel an la ngaih thu a sawi a. Hmeichhe naupangte an inchhungkhur mai bakah sikulah leh khawtlanga an himna chu sawrkar hmalakna bik tur ni lovin kohhran, khawtlang leh tlawmngai pawl hrang hrangte bakah zirtirtute nen thawhhona tha tak neih chhonzawm zel a pawimawh tih a sawi a ni.

Byte of Minister Pi Lalrinpuii

Gauhati High Court Judge, Justice Michael Zothankhuma pawhin thu sawiin India ram dan chi hrang hrang hmanga hmeichhe naupangte chanvo leh humhimna a siam thu leh zawm that a pawimawh thu a sawi a. Mizoramah a vawikhatna atana hetiang hun buatsaih a ni chu hmasawnna pawimawh tak a nih thu leh hei hian awmze nei zawka hmeichhe naupangte humhim kawngah hmasawnna a thlen ngei a beisei thu a sawi a ni.

He hunah hian hmeichhia te venhimna tur zirho a ni a. Thupui hrang hrang zirhona leh sawihona hun chu a kaihhnawih Mizorama sorkar department hrang hrang aiawhte kaihhruaiin hman chhonzawm a ni.



CSS EMPLOYEE

All Mizoram CSS Employees Coordination Committee-in CSS Employee tana duan, CSS Regularization Scheme 2024 hmanga Health Department hnuaiah Provisional Employee mi 31 dahngheh an ni chu an lungawi loh thu an sawi a, karleh Zirtawpni August ni 29 hmaa sut turin Sorkar an phut.

All Mizoram CSS Employees Coordination Committee hi nimin khan Vaivakawn YMA Hall-ah an thukhawm a, kumin May ni 19 khan CSS hnuaia thawkte an ngheh theihna turin Sorkar an ngenna chu vawiin thlengin chinfel a la nih loh laia August ni 21-a Health Department hnuaia Provisional Employee 31, CSS Regularization Scheme 2024 hmanga dah ngheh an ni chu an hrethiam lo tih an sawi a. CSS Regularization Scheme 2024 chu CSS Employee tana duan a ni a, vawiin thlenga a scheme neitu CSS hnuaia thawkte dah ngheh an la nih loh laia, Provisional Employees-te hman tir a ni chu thil dik ni-a an hriat loh thu leh an lung a awi loh thu an sawi a, hei hi karleh Zirtawpni hma ngeia sut turin Sorkar an phut a, an beisei anga hmalakna a awm lo a nih chuan an kal zel dan tur an ngaihtuah leh dawn tih an sawi.

